

KA UITASHKUMAT

Ishpashtien Nuna

Mamaushuat itakanuat. Uitsheueu ukussa – apishissishinua
nenua ukussa – nete memaushuht. Tshék ekue tshitshipatat ne auass. Kushtineu.

— Eka tshitute, iteu.

Tshék apu papissenimat tshetshipataniti nenua ukussa. Tshék ekue uniat.
Tshessenimat, ek^u at nianatuapamat, mauat. Natshishk itakanu ekue uniat, napinnit nenu.

Pepunnit ma ek^u peuatat ne napeu. « Ekute anite eukuannua
ka-utinikushapannua », ishinueu.

— Nipuatau tshikussinán ka unik, iteu, ekute anite ka-tashapanua, nitishinuau.
Mashkua ka-utinikushapanua, nitishinuau.

Nika natuapamau. Tshé petaut umatshunishima, mak utapanashk^u
nika tshitshitapen, iteu.

Ek^u tapue niatat, nenaunikanniti umatshunishima, ekue tshitshitapet, ekue tshitutet.
Ekute ka ishinak, ekute netu-nameiat, eukuannu nemenu etaniti tapue mashkua. Ekue
panakuneuat.

— Unui ! iteu ukussa.

Ekue pituteuetishinamuat umatshunishiminua.

— Tshishuashpishu ! iteu.

Ekue tshishuashpishuniti. Mishishtu ne auass. Ekue tshishuashpishut. Ek^u nenua umashkuma, nipau ne uin. Kenuenimat ma nanitam nenua.

Tshek ekue puatat umushuma ne auass.

— Eukuan eka nita muk^u mitshetuau tshika uin, itiku. Nanitam tshika uapimin anite tshe ut piputueian, patush shuk^u shauennanuti. Nish^u eukuan tshe ishpish uinin.

Ek^u tshek ekue shiueniht.

— Ma na nimushum uet piputueut, iteu mani.

Tshek mitshet, tshek patetat itakanu peikupipuna nenu. Nemenu ma mashten patetat itakanu, ekute eshitatshimakanit tanite apu tshi pimumet. Ekute pepanakuneuakanit ne mashk^u. Katshi panakuneuat, ekute anite ianakanit tanite utatshimakanu, uishkueietatshimakanu. Apu auat tsheshtinu tshi passuakanit ne mashk^u, ekue unuipaniut itakanu, ek^u miashikakut ne auass.

Nisht^u peikupipuna, uesh an apu nita mitshet nipiakanit mashk^u peikupipuna. Nemenu ma patetat itakanu, patetat nenu katshi uinat, shash eukuannu patetat uanat peikupipuna nenua umushuma.

Ekue panakuneuakanit ne mashk^u. Katshi panakuneuakanit, nete anakanu itakanu anite utapanit ne auass. Utatshimakanu tanite apu tshi pimumet. Uipat ma katshi panakuneuakanit anite itakanu mashk^u, ekue unuipaniut itakanu, eshk^u apu tshi passuakanit auat, nemenu. Eukuannua niatshi-kuashkututu itakanu nemenua ussima. Ekue mashikakut itakanu.

Eukuan eshkuapetshishit.

